

<b>Zeitschrift:</b>	Annalas da la Societad Retorumantscha
<b>Herausgeber:</b>	Societad Retorumantscha
<b>Band:</b>	83 (1970)
<b>Artikel:</b>	Legendas, parollas, fablas, evenimaints digl temp passo antuorn Brauégn : mess an s-chet rumantsch da Brauégn da Zon Zanett Cloetta : 1962 : III. part (vair toms LXXVIII 1965 e LXXIX 1966)
<b>Autor:</b>	Cloetta, Gion Gianet / Cloetta, Zon Zanett
<b>DOI:</b>	<a href="https://doi.org/10.5169/seals-229245">https://doi.org/10.5169/seals-229245</a>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 23.08.2025

**ETH-Bibliothek Zürich, E-Periodica, <https://www.e-periodica.ch>**

Legendas, parollas, fablas, evenimaints  
digl temp passo antuorn Brauégn

Mess an s-chet rumantsch da Brauégn  
da  
*Zon Zanett Cloetta*  
1962

III. part

(vair toms LXXVIII 1965 e LXXIX 1966)

40. *Da lugfs a dad uors.*

Cun lugfs ad uors vègvan igls noss pardavants tschearts temps ben bglier da cumbatter, a kè anfen igls 1880, anoua chi è gnî schluppatto igl davos uors sé'gl territori digl nos circul. Igls lugfs eran prievlugs er par la gliogd, a vitturins chi zegvan d'anviern par streda vègvan kelchagedas battostas cun da kistas bes-chas. Ev d'è ancha ben andiment kè ch'igls vîgls kintegvan ad a nogs buébets, cha vitturins cun passer zo da Streda vazan mazzo en lugf chi legva der a diéss li chavagl ad ad els. Kel vègva bi igl nugf d'ena tretscha ple ent igl magon. Kè po asser stô kel cha Meschal Silvester Kuss da Falisogr a'gl Meschal Lozi Zumbro, er da Falisogr, an «pglio» digl 1794. Menz prievlugs palla gliogd eran igls uors, ma tant daple palla bieschza sén alp a parfen sé'llas pas-chigras dlas acclas a da chesa, ma principelmenz pallas nuarzas. Par anguét nu degv'ni schluppet a puélvra li nurzer. Ad ev m'algord ancha ben auenda, cha nogs gianegra vègvans temma digl uarz, passond tres igl god, apir nu vègvans ancha vês angin, bi santî a kinter. Ma ampè da kinter sé cò en' istoargia dad uarz a da lugfs, laschi seguégr la cronica da kellas melprivadas bes-chas, scu ch'ella resulta digl cuédasch da kents No. 1: (kè era adena igl Landamma chi randegva kent):

1735	vol el p/havair paio mr. Enderly Gillj p/gl uortz	f. — : 36
1748	It/vol el p/havair do oura a Johanas Dans p/ilg uors ultra ilg arfschia, daners	f. 2 : 32
1760	p/havair do a 2 chatscheders chi haun piglio l'uors p/spaissa da quels chi sun stos zieva l'uors	f. 3 :— f. 2 :—
1762	p/el uors piglio in Engiadina Bassa p/puolvra al nursser	f. 1 : 24 f. — : 24
1768	p/quaraunta pfonds puolvra paio a Coira p/spaissa fat p/viedi a Coira p/puolvra Canz. Jos. Köel vol per se et p/ilg Hantz Mustein caussa igr zieva ilg uortz, sco eir tants Lozi Schmit, in tuot	f. 32 :— f. 10 :— f. 2 : 12
	Janpitschen Cloetta vol p/havair do la catscha il uortz Cubi Jacob Gilli p/lavur, salari sco eir per igr zieva l'uortz	f. — : 44 f. 4 : 42
	Jan Dilg Josch Pol Clo vol p/igr zieva ilg uortz	f. 1 : 50
1782	vol el p/spaisas fattas p/igr zieva la Chiatscha p/vin bavieu dalsc da Latsch tiers l'osto da comön cura jeus zieva l'uors	f. 3 : 47 f. 1 : 7
1784	ho paio spaisa per igr zieva ilgs Lufs	f. 1 : 2
1786	ho paio a mr. Janpitn. Cloetta et mr. Jacob Gilly per avair piglio in Luf ho paio a Ml. Selvester Kuss e seis colegas Lutzi Zumbro & Mehel Schmit da Filisur p/ün Luf	f. 13 : 30 f. 13 : 30
	Denovo paio a mr. Janpitn. et Matias Gilly p/ün Luf paio ad Andrea Rauch et a Clo Mechiel, habitants sün Latsch pün Luf da deto. piglio	f. 13 : 30
	Denovo paio a Ml. Silvestar et als p/fats colegas p/2 Lufs	f. 27 :—
	p/tössi p/ils lufs fat gnir da Coira	f. 1 : 9
	Paio a 2 homens da Lugnetza p/havair piglio ün Uortz	f. 1 :—
1788	A quels chi haun piglio Lufs, Uors u otras beschias ferocas	f. 6 : 4
1794	Ml. Silvestar et Ml. Luzi Zumbro p/havair piglio in Luoff Ad in chi ho viglio l'Uors	f. 3 :— f. — : 40

1797 Ent igl inventar dlas robas dla vischnancha figureschan er 12 crennas d'puélvra, cun igl sach (1 crenna = 750 grams) chi druegvan principelmenz pa'gls sudos, pa'gls chatscheders, ma er par saglianter crappa.

Tant anavant igl Cuéd.da Kents. Ev pss anch'agiundscher:

Ad a nogs buébs kintegvan igls vîgls, cha ent pa'gls 1870 sèjan schlupattos antuorn Brauégn ancha 3 uarzs. Sé'gl prem vegva traz igl Spegnas, en renomno chatscheder da Tinizun, ent igl god sur Chastî. Ma igl cuélp nun era stô mortel, a'gl uarz ò traverso ent igls gods da Surava, Falisogr a Brauégn, adena pardond sang, anfen sé'gl Crap Alv a rivo a la davosa sé'lla Fuorcla digl Crap Alv, anoua ch'el s'ò mess a la fen da l'otra vart dla Fuorcla sot en zondaratsch a giaschegr. Spegnas igl vègva perseguito aden'anavant ziev'igl fastaz da sang, ma nun è mè gnî d'igl veqr a pudegr trer anch en cuélp. A Brauégn vaza'l clamo an azegd varzacants chatscheders, igls signugrs da kella geda — i gnegvan numnos igl Ml. Pol Buol, pi tard cussglier guovernativ, igl Scrivant Peder Cloetta, igl Scrivant Chasper Cloetta a'gl Meschal Guélf Giuota — a l'antiera cumpagneja s'ò messa an viedi. Rivos da l'otra vart dla Fuorcla Spegnas vaza dô îgl li uarz sot igl ses zonder, ma igl glistess mument igl uarz sèja alvanto séllas chommas davos, ma igl Spegnas nu vaza er bech pearz temp a dô speart anch'en cuélp, kista geda mortel. Digls sbrîzs digl uarz igls signugrs da Brauégn sèjan gnîs sblachs a vazan cumanzo a trambler. Ma igl uarz sèja crudo antemal a stô moart.

Igl sanguend da kels tregs uarzs surnumnos sèja gnî ferî antuorn Preda a schluppatto sé Mulix. Igl chatscheder nu'm è cuntschent. Ma igl tearz a davos è gnî schluppatto digl cuntschent chatscheder a bun parent Zachen Linard da Falisogr, cha ev d'è ancha zî a ben cugnuschi. Kel uors è gnî schluppatto or a sé sur las Blegs d'Urmena a vaza pso catter centners (200 kilos). El sèja gnî purto da catter omens ent a zo'n Crastota. Zieva paregva igl uarz spari dla nossa val.

Ma igl settember 1880 ò fastizo igl Albert Rauch da Latsch, igl cuntschent a bun chatscheder da chamuétschs, en zé chi era crudo ena negvetta en uarz chi era î dla Valzana vé ad ent la trigda ad intrasebla chavoargia dl'Ava da Plazbî bi dadens las Punts d'Alp. El ò clamo an assistenza igls ses duos frers, Duésch a Not, tots duos chatscheders ad omens zouans a curaschugs. Igl Not gnegva kelchagedas

tar nogs a zider fer fen da cuelm a'ns ò kinto ple cu ena geda da kella chatscha. Lis duos frers ò igl Albeart dô cumond, dad egr sé vears Fregslas alogra zo ent la chavoargia a chatscher igl uarz cun schegvals a sbrîzs or vears las Punts d'Alp, antant cha el sèz spizzegva kiora survart. Usche è'g-l dvanto, a cur cha la bes-cha as ò ficheda tres las cheglas ad è gnegda visibla, ò'l traz en ton, chi nun era però mortel. Igl uarz as ò drizzo drèzsé, scu par tscharcher igl anamei, ad ò sbrizî telmenz, cha lis duos omens chi eran poch distants è gnî la pial d'gigliena. Not dschegva, cha el meditegva kè mument, anoua ch'el pudess as salver. La situazion par kels duos era critica auenda, as rampigner sé par en bos-ch nu zidegv'anguéta, ad els nu vègvan otr'arma cu en baston — a'gl curtî da gigliooffa! Furtinedamenz ò igl Albert pudî der ben speart anch'en saguend ton antant ch'igl uarz sbrizégva, a kel igl ò tarro. Igl uarz è gnî transpurto sén en char da fen or a Brauégn, anoua cha nogs buébs eschan currîs speart zo'n Plaz, cur cha la noua insolita as vègva deraseda tres vischnancha scu en lamp. Er ev d'è dimena pudî vegr kista bes-cha, chi pgliiegv'or l'antiera lungezza a largezza digl char, a ch'ev nun è mê vês ple, ni anz ni zieva. Igl zé zieva legva'l transpurter la sê biala praja zo Cuégra par vender li bacher Rungger, ma angin chavagl nu legv'as lascher metter sot, igl davos ò'l stî pglier la «hanna» vîglia digl Valanten Sarena cu'gl ses pècl lung sur igls chierns. Igl fol ò aquisto igl Colonel Theophil de Sprecher a Majavilla, il lascho impagliet a plazzo ent igl pierti dla sè chesa. Lò sèj'el da vegr anch'oz, fadschond igl omin cun en alumbard ent las tschattas. L'antiera chatscha vaza purto ent, cumpregs igls premis, 600 fr.

Anch'en istoargetta d'en oter uarz, er en digls davos antuorn Brauégn. Cur ch'ev zegva cull'Onda Nanna ad accla, la prumavegra igl prem ent a Tuors-Naz a zieva sé Sagliaz, igl uton darcho ent igls Naz, am kintegv'lla adena anchiche, uben ch'ella chantegva da kel-las vîglas a privetas chanzonettas populeras? «Allegraivla vita mia!»

Sé'll'accla sésom da Sagliaz stègva avant bech bgliers ons avant — probabel ent pa'gls 1870 — en tscheart Patzen, fittaden digl Hans Gregori. En zé er'ni stôs culla bieschza sé vears Darlux a fen sé'll' Alpetta. La sègra manchegvan li Patzen igls ses duos puschs, ad el as ò faz digl god sé par igls tscharcher. Cur ch'el era bod sé'gls pros da Darlux — kè era ancha zî la veja vîglia, chi vo dlas acclas drèzsé; la veja noua è gnegda fabricheda 1908/09 — gnegva en digls puschs

tot a'gls rapats zo par veja, scu sch'el vess igl dimuni a diéss. Kècò ò parî li nos Patzen en poch bun sen, ad an prescha è 'l rivo sé'gls pros. Cò vez'el en uarz chi schuregva d'igls pros ent a zo, antant cha la vdiala giaschegva s-charpeda a miaza veja. Tot spavento è currî igl por fittaden zo Sagliaz a zieva er zo Brauégn a plan-dschegva an ses dialect dla Tumglieas-cha: «O Deus, Deus! Igl uors ha scarpeu mia vadeala!»

En cas da chatscha dad uarz tot speziel è dvanto igl on 1833. En uarz as vègva faz vegr anzanouas sé'gl nos territori, a scu'gl solit èn igls chatscheders gnîs avisos, dad «egr zieva». Er igl cuntschent Gian Marchet Colani da Chamues-ch vaza s'esibî da chatscher kist uarz a kè tottafaz gratis, ma el nu vaza surgnî angina raspoasta. Però ad en tscheart Andreja Rauch da Falisogr, chi nun era Grischun, ò la Suprastanza dô igl parmess dad egr ziev'igl uorz a scu paja dafaz dô igl drèz dad egr a chatscha da chamuëtschs. Ma glièz nun era parmess par chatscheders bech grischuns tenor la ledscha chantunela digl 1826, a la chatscha appartgnegva kella geda tottafaz lis vischnanchas.

Cunter kel proceder ò recurrî en oter chatscheder, igl Mattejas Sutter da Latsch/Sculms, avant igl Pitschen Cussegl igls 24 avuost 1833. El era ï sèz a Cuegra ad ò inoltro igl recuors an parsona. Igl medem zé ò igl P. C. screz «an Landammann und Obrigkeit des löblichen Gerichts Bergün», chi dessan pglier cognizion digl recuors, ma digl rest ster stricte a la ledscha, aschiglio ch'el as realva da pglier las amzégras adattedas years la Suprastanza.

Igl recuors, scu chi pera, nu sto adavegr uzî en resultat satisfacent, parche igl Mattejas Sutter recuerra igl nuember la saguenda geda t'igl P. C. a kista geda plandsch'l er, ch'igl Andreja Rauch a'gl ses fegl sèjan telmenz agitos years el, ch'el nu sèja mianch ple sgigr dla veta. Ma er la Suprastanza sèja totelmenz cunter el. Par der ple foarza li ses recuors vègva'l ramasso la sottascripzion da begliers chatscheders an bod tot las parts digl Grischun, usche ch'igl recuors poarta 39 sottascripzions, la prema Matheus Suter, la saguenda Gian Marchet Colani. Cò cha la fatschenda è egd'or, nu'm è cuntschent.

#### *41. Dad otra sulvaschena*

Digl temp feudal, ancha avant en miaz millenni, appartgnegvan chatscha a pas-cha lis signugrs, lis possessogrs dla tiara. Nogs san ancha or digl temp da scola, cha igls Cunts de Werdenberg cu'gl ses kino Hans da Rechberg legvan assagliégr 1451 kels da Tschons ad anguler las viglias liberteds da kè pieval, fadschond fenta fa fer lò ena gronda chatscha cun bgliers anvidos. Cò tar nugs regnegva igl uègs-ch da Cuégra. Cur cha kel ò vandî la Signureja da Griffenstein 1537 lis catter vischnanchas, schi ò'l zidî cun kella vendita er igls drèzs da chatscha a pas-cha, chi èn restos par seculs an possess dlas vischnanchas. Kè ò diro anfen 1848, la fen dlas vîglias Drezzebras Usche as anclîz'igl, scha p. ex. la vischnancha da Falissogr digl 1811 ent an en contrat da vendita da gods cu'gl impressari dlas minieras a dla fundareja Balalen, Dr. Christof Trümpy da Glarus, fo la cundizion, cha el nu suos-cha ni egr lò a chatscha ni pas-cher. Culla noua constituzion digl 1848 èn kels drèzs ìs an possess digl chanton. Scha kel ò bonifico lis vischnanchas par en possess, sto aquisto a ses temp cun blozgers blots, nu sto scréz anangiugr. La patenta da chatscha ampurtegva anch'igls prems ons, ch'ev zegv'a chatscha, a fen 1902, fr. 8.— fr. 13.— anfen 1913 a zieva fr. 40.—, pi tard fr. 60.— ad oz fr. 100.— par abitants a vschens digl pajegs. Ma adonte la taxa bassa eran ancha years la fen digl 19. secul pochs chatscheders cò antuorn. Igl Albert Rauch scregva da kella geda, cha'l ò schluppatto igl uorz digl 1880. cha el ad anch'en cumpuégn da Farrera eran igls unics chatscheders ent an tot la Val da Tuors. Ad ancha igls mes prems ons erans lò miáncha d'iesch. Cò as pudgv' igl fer ancha ena chatscha raziunela ad er giudegr aschiglio anchiche da kels bials zegs d'uton a da plena liberted. Ma schon years igls 1920 s'amplégva la val vi a ple cun chatscheders êsters — i era gnî faz brav propaganda ent las giazettas — chi nu's pudegva ple fer en pêr tschient pass senz'antuper en chatscheder. Kè era bi ple en cuerrer a sagliegr, angina pussibilted da gnegr tiers a sulvaschena chi's vègva vês, bi en cas, schi's gnegva tiers da trer sèn chamuétschs chi schuregvan dad oters chatscheders. Kè era bi ple en mazzer sulvaschena. Ad ev d'è zidî!

## *1. Igls stambochs.*

Kels eran svanîs avant diversa tschient ons complettamenz or dlas muntuégnas grischunas a svizzras. Bi a'gl pè digl Mont Blanc an Itaglia era ancha resto en reservat ch'igl rach Victor Emanuel parchiregva cun chigra. Da lô èn gnîs igls stambochs ent igl park Peter und Paul a St. Galla a da lò transplantos ent las Graue Hörner ad an Grischun. Ev m'algord ancha, cha igl zé dla fegra digl Buégn ans vêrs lò duos stambochs ent an chaschunas, preparos par gneigr transportos sé'llas alps dad Alvagné sé years igl Guggernell. Kella colonia nun ò uzî lungia direda. Igl bogv attachegva igls tourists, en signugr Gygax da Turi era gnî blesso melamenz, usche chi'gls an stî alontaner. Benbod zieva èn gnîs mess or divears stambochs sé antuorn Uglis, a'gl Zachen Schmed igls ò parchiro ons ad ons, ma plansî enni svanis er kels. Antant è naschegda bod da sè ent a Puntraschena antuorn Languard ad Albris ena gronda colonia chi s'angrondescha adena ple, glistessamenz er an oters lîas dlas Alps svizzras, usche ch'igl stamboch ò darcho as chaso ent.

## *2. Igls chamuetschs.*

Venan avant an tot igl territori dlas Alps, ent las Abruzzas, an Dalmazia, ent igl Kaukasus ad ent las Karpathas a Pyrenäas. Igl chamuëtsch dlas Pyrenäas ven numno lò Jsard a sèja pi pitschen. Cò tar nogs è igl chamuëtsch ena sulvaschena dlas pi vîglies. Dr. Heck, igl directer digl Zoo Berlin antuorn igls 1900, zi, ch'el gnegva avant schon igl temp glaciell, dimena avant bgliers millennis. Bech par anguéet, chi'igl chamuëtsch è gnî scu vopa ent an ena dlas pi vîglies nossas famiglias, t'igls Pol Clo, zieva er digls Gregori, chi deregvan digls Pol Clo.

Antant cha igl prem temp dla chatscha chantunela diregv'la divears megs, er'la restrèzza digl mes temp sé'gl settember, ma pi tard, cerca digl 1913 davent, bi ancha digls 9—26 sett. scu chi è er ancha oz. Digl megster Albeart Cadonau, chi era farrer, stègva ent an kella chesina zo'n Fuschena davos la chesa Tempini a vègva la sê fuschena ent la chesetta Barandun, oz Caplazi, védvart la Punt Fuschena, gnegv'igl kinto, ch'el vègv'en salen vé'n Pentsch, acur el lavuregva an fuschena, zegva'l minchatant or sper la sê chesa a gardegv'or cu'gl

spioual schi sèja chamuétschs vé digl salen, a schi era anchiche lò, schi barattegva'l igl scassel da farrer cu'gl schluppet a zegv'or a gnegv'alogr'a chesa cu'gl chamuétsch.

Anch'en'anecdota. Igl bun Zonzachen Gregori era en paschiuno, ma ampo cumadegval chatscheder, parkè gnegva'l dla chatsch' ota solitamenz a chesa cu'gl kittel net. Igl mes bun chantunegs a vîgl amej Clo Gregori kintegva: En zé eri sé Muét a vez cué anz nouas igl Zonzachen a's struzcher planin vé davos en bot. El végv'er schon vêts kè chamuétsch vé lò, cha ev vègva schon d'en'uriala an ïgl, ma nun è lî egr tranter ent, vzond ch'el legv'egr a tigr. Igl por Zonzachen stègv'er pudegr ena geda fer gnegr cuétschen igl kittel. A bravamenz! El è gnî a tigr, ò traz ad er schluppatto igl boch. Ma oss'el stô sé ad ò zet bi da par sè, ma schi dad ot, cha d'è ancha santî, parche ev nun era dagluntsch: «Oss'è'gl pi mal!»

### 3. *Igls tschearys.*

D'igl mes temp nun eran schon da zî mê stôs angins tschearys cò tar nogs. Ma benbod as ò'gl santî, ch'en vaza vêts da kels or igl Partenz, or igl Schalfigg a parfen sé Tavo. A kè nun è i zî, chi èn rivos er sen territori da Brauégn. En uton antuorn igls 1900 as ò'gl santî an vischnancha, cha en chatscheder vaza schluppatto ent igls piccals digls Cuétschans sur Liadenas zescht duos da kels kerlis, chi sèjan alogra rurlos zo par kellas ertarejas anfen zodem las Blegs. Igl Sar Revarenda Clo, chi era stô kè bial zé d'uzouar cu'gls ses mats ent an Ravegsch, vaza zescht vêts a'gls rurler, an turnond anor, ad els sèjan ìs vé a'gls garder. Igl defraudant nun an'ni mê chatto or, parche kel, vzond igls turists a'gl prioual chi amntaschegv'ad el, ò uzî la prontezza da spiert, da's fer dalonch or dla puélvra ad egr cun chalzers da siat miglias or a zo la sê accla, anoua cha'l vegva la sê bieschza, as mider a's metter a fender lena davant l'accla. Ziev'ena bun'uriala venan er igls turists or par veja, as fearman en mument lò tar el a discuerrer: «Est diligent? Oz est gnî ent bod.» A l'oter: «Mo hei, ev nu vègva zescht lavogr urgenta. A kista lena lessi fer sé a metter sot tèz anz chi gness la negv.» A'gl bun Sar Revarenda as varo zet: Parnageda kist nun er'igl! Ma zescht *kist* ò kinto ad a mé pi tard, cô cha'll'er'egda, uschè cha sè or da prema funtana.

Igls tschearts s'an plansî augmentos an tot igl Grischun telmenz, ch'els fan grond don ad en dvantos par tschearts lîas ena plaja. 1961 èn gnîs schluppattos an Grischun 1879 tschearts a 2904 chamuétschs, ma i eran er an 4500 chatscheders!

#### *4. Igls chavriogs.*

Da kels nun eran anch antuorn igls 1900 cò angins. Ma poch zieva ènni cumparîs, a kè bi dalonch an cunsiderabla cantited. La biala a plaschegvla bes-chetta è en ornement dla nossa nategra a stess gnegr preserveda, ella nu fo er angin don. Ma pirmemma ven' lla decimeda adena ple, melaveta!

#### *5. Las mantunellas.*

Da kellas è'gl adena stô auenda dapartot sé'gls noss cuélms, ena bitteda avant cerca 40—50 ons er memma bglieras, chi an p. ex. dô leber en on sén Tschitta ena chatscha speziela. Pi bod ad ancha digls mes algords gnegva faz bglier fraud cun chaver mantunellas. Ent an en protocoll dlas III. Leias digl 1590 stat screz «dass Bergüner, welche der Murmelthieren halber zu Davos gebusst wurden». Ils 2 nuember 1920 è gnegda chaveda or ena tana sén Uglis (vegr Fögl d'Eng. 9 Nov. 1920) cun parmess dla regenza pa'gl Zoo da Basilea. Da kella geda as so'gl prizîs, cô chi gard'or ent an ena da kellas tanas: En chamen sutteran da cerca 10 m cerca en m sot tiara, oradem ca. en m zuglio cun tiara masdeda cun fen, entasom igl léz, ena fora da ca. 70 cm diameter a 25—30 cm otezza, antant ch'igl chame'n vègva en diameter da 15—20 cm. Ent an duos léz entasom igl chamen, cerca 3 m l'en da l'oter, an'ni chatte 15 tochs, chi stègvan an en rench cu'gls chos antemal an buttatsch. Kè eran 8 femnas a 7 mas-chels, tregs eran giattins. Cun pglier or a transpurter cumanzegv'ni ben a fer pitschens muiments, ma nu sèjan sdasdadas anandrèz.

#### *6. Las gliogrs.*

Igl zouan Gubert de Salis, fegl digl Guvernatogr Gubert, chi stat sé'lla tevla cun vopa anch'oz vé d'igl migr digl Hotel Piz Ela, era

sto d'igls 22 sett. 1723 anfen igls 18 sett. 1724 a Lausanne a stiger. La sted zieva, 1725, è'l stô a Brauégn an vacanzas d'igls 1. fanadogr anfen igls 21 sett. par cuntinuer cu'gls ses stedis, ma zegva bod mincha zé a chatscha ent igls gods cò antuorn a fen or a Chastî. El a'gl ses camerad Léon vazan schluppatto an totta sted 57 gliogrs, 7 fasans, culombs ad otras bes-chas. Ev d'è lîz mèz igl ses diari ent igl archiv de Salis ent igl Bothmar a Malans.

La sted 1726 è'l darcho stô sur sted a Brauégn a zegva bod mincha zé a chatscha, ma tranter ent stègva'l er as dedicher li sê chera spogsa Jacobea von Buol. Igl uzouar è'l darcho turno sé Brauégn, a'gls 16 uz. era Tschanteda ad el è gnî tscharnî Landamma. Da 19 ons! Ma duos d'igls ses cumpuégnns digl «Drèz», igl Land. Clo P. Pol Clo a'gl Scrivant Jan Jochberg, an stî egr d'igls 2—8 nuembar or a Malans tar el a pglier instruczion.

Igl anviern 1853/54 d'igls davos avuost anfen igls 1. marz ò igl Meschal Uori Gregori (stô landamma 1853/54 a 1857/58), bap digl Zonzachen supranumno, schluppatto 20 gliogrs, a da kellas 15 l'ena zieva l'otra, mincha zé ena. Usche kenta'l ent la sê cronica. Meschal Uori era naschî 1809 ad è moart 1885.

#### 42. *Da Muntafuners a Prantaviners*

Che è'gl kècò? Mo: Muntafuners èn Muntafuners. A kels gnegvan pi bod kelchagedas cò tar nogs a chaver rigschs, ad or da kellas gnegva arz vinarz. Kècò era alogra igls Prantaviners u Brandenweiner. Igl arder vinarz or da rigschs d'gianzana a pomma chora era en'epoca en'industria speziela da Brauégn, Parfen la puiseja as ò ampatrunegda dad el. Ena chansonetta populera, componegda dad en poet bergunziner incuntschent probabel antuorn igls 1800 a chi gnegva mincha cas er chanteda dla zûanterna da kella geda, a cha d'è chatte par cas sén en vîgl manuscrez, igl manzona. Ella cuntona igl bial verset:

Scha la sted chi fo bial'ora  
a la frézza ven madigra,  
fan'ni vinarz cun pomma d'chora  
a vendan kè par roba spigra.

Daple gnegva però arz rigschs gianzana. Igl nos archiv cuntena ben bgliers documents da kella vart, principelmenz igl Cuedasch da Kents I.

1772 Igl Meschal Pol C. Gregori, stô kella bitteda par cerca 20 ons fittaden ad ustier digl Crap Alv — digls 1780 ad 1784 venan parfen battizos duos digls ses umfants, Pol ad Anna, cusé — vègva chatte cò ena noua funtana da gaduégn, vègva pglio notiers Muntafuners a faz chaver totta sted rigschs d'gianzana. Ben ch'igl Crap Alv possedegva schon kella geda en grond territori, schi nu bastegv'igl, ad en è gnî sésogr, ch'el vègva lascho chaver er sén territori da vischnancha senza parmess. Usche è'l gnî chastio ad ò stî pajer li vischnancha dîesch bials Rentschs.

Cunter bonificazion gnegva dô a privats igl parmess da chaver da kellas rigschs. Kè eran par part dla nossa gliogd, par part êsters a kels occupegvan ena partegda d'gliogd, chaveders (Graber) ad ardeders (Brenner). Kècò eran igls Muntafuners a Prantaviners!

1790 Ml. Steffan Cloetta renda kent:

p/metter in chiascha tenor quint sto fat da daners da Pensiun, stipendi, taschin et brandenviniers.

Chi chi era ad anoua chi an chavo, nu ven zet.

1792 Land. N. d'Nicolay renda kent:

p/nomine Banadichta p/arder vinartz Ao. 92 cun 8 persunas à fl. 6.— p/persuna vigor acordo fl. 48.—

La Banadichta era la veva digl Bandict Ambass, chi stègva ent la chesa zodem vischnancha, oz Mag. Roedel. Igl fegl Jacob, naschî 1796, e dschlo scu chavaller sen Alvra igls 20 schnere 1844.

1794 Land. Christoffel P. Buol renda kent:

La Benadita peja p/arder vinarz p/duos ans fl. 57.—

1833 Li Mr. Mangart ven dô igl drèz da chaver rigschi d'gianzana sé'lla Val da Preda par 50 fl. cun 4 Grabers ad 1 Brenner.

(Actas vîgliaas Mappa B)

1846 Li Peter Guler da Clostra ven dô igl drèz par 3 ons da chaver rigschs ent la Val da Tuors par 120 fl. igl on cun bech daple cu lo Grabers, a zieva par 2 ons à 100 fl. sén Preda.

(Prot. 1. 1832—81)

### 43. *La disgrazcha sé'gl Deposit da Tesch 1840.*

Las minieras da Tesch culla fundareja digl Balalen èn stedas an funczion anfen 1848. Proprietaris eran digl 1826 davent Bundespresident Christof Albertini ad Oberstleutenant Raget Abys, tot duos da Cuégra. Zo'gl Balalen vègv'ni Versell scu administradogr. Durant la sted chavegvan igls cnaps igl crap da fier a'gl mnegvan anfen zo'gl Deposit a miaz la pas-chigra visavis l'Alp Noua da Tesch, probabel cun curnîs. Lò era a la davosa en manton d'crappa scu ena muntuégna, ch'igls pogrs da Brauégn a Latsch mnegvan cu'gl ses bogvuns da 4—5 ons a bennas anfarredas sur anviern, da nuember anfen marz, or a zo'n Prasegras u Farrriola u er anfen zo'gl Balalen. Er igl mes tat Stegvan Cloetta (1811—83) a'gl barba Pol Nicolay (1820—1896) an mno kelcha cheargia zo da Tesch, alogra er igl mez tat Plesch Nicolay (1799—1844) a zieva igl ses fegl Stegvan, mat da 15 ons, chi ò rot chomma an kell'occasion a patî londarvé igls zegs dla sê veta, anfen ch'el è moart 1904 a St. Vaast an Frantscha.

Igl 4 favrer è gnî sé'gl Deposit en om da 33 ons, Giuannes Giandin da Latsch palla veta an trista maniera. Ent igl cuédasch da mortoris da Latsch stat'igl screz «Igl 4 favrer 1840» Johannes de Hans Jandin, naschieu 25 meg 1807, marido cun Sofia Florinett, Wurde vom Einsturt eines gewölbten Haufens Eisenerzes, im Bergwerk Tisch schrecklicg zerschmettert». Igl barba Pol, chi era preschent, ans ò kinto ancha divears detagls: «Igl grond manton d'crappa era dschlo tot an en toch, impussebal da charger. Parkè era gnî faz ena fora sotent scu en tunnel, cuènt la crappa nun era dschled'anzemal. Cò mattegv'ni igl materiel ent an vonets a purtegvan or ent la benna. Ena geda, cha igl Giuannes Giandin era cuent, ò dô ent igl vogt survart a'gl sepuli ent sot la crappa, nogs igl an stî chaver or, ma el era sputo anzemal an schgrischugsa maniera, usche ch'el saro stô moart bi dalonch. Nogs igl an transpurto a chesa ent an ena benna. Che sgrischugsa noua è'gl kè stô palla sê donna chi era ossa cò suletta cu'gl ses unic fegliet da bi 8 megs. Els vègvan marido avant duos ons».

*Genealogia Giuannes Giandin*

1. Duosch D. Jandin	Maria P. Florinett	1. 5. 1747
* *	* 1719 † 1774	
Inf. 1. Duosch	* 12. 12. 1747 † 9. 1. 1798	«sin Alvra»
2. Pol	* 23. 11. 1750 † 25. 7. 1824	m. Maria T. Schmit 1786
3. Hans	* 14. 11. 1753 † 15. 1. 1831	(2)
	m. Anna Hans Anbiel 1805	
4. Nott	* 13. 5. 1762 † 14. 10. 1812	
	m. Margr. D. Schmit 1790	
2. Hans Duosch Jandin	Anna Hans Anbiel	23. 6. 1805
* 14. 11. 1753 † 15. 1. 1831	* 29. 9. 1770 † 23. 2. 1854	
Inf. 1. Johannes	* 25. 5. 1807 † 4. 2. 1840	(3)
	m. Sofia Jac. Florinett 1838	
2. Pol	* 12. 2. 1809 † 2. 12. 1897	
	m. Urs. Mart. Muntsch 1839	
3. Uorschla	* 26. 12. 1811 † 25. 2. 1877	
	m. Mich. Joos Schmid 1852	
3. Johannes Hans Jandin	Sofia Jac. Florinett	1838
* 25. 5. 1807 † 4. 2. 1840	* 1. 8. 1805 † 8. 9. 1864	
Inf. 1. Hans	* 2. 6. 1839 † 13. 1. 1895	(4)
	m. Mar. Barbla J. Sutter 1871	
4. Hans Johannes Jandin	Maria Barbla Jac. Sutter	17. 4. 1871
* 2. 6. 1839 † 13. 1. 1895	* 30. 10. 1849 † 19. 6. 1915	
Inf. 1. Babetta	* 25. 1. 1872 † 26. 2. 1951	(5)
	m. Jacob M. Nicolay 1900	
5. Babetta Hans Jandin	Jachen Marchet Nicolay	23. 5. 1900
* 25. 1. 1872 † 26. 2. 1951	* 21. 8. 1872 † 24. 10. 1959	
Inf. 1. Mengia Almina	* 20. 3. 1901	
2. Hans Oscar	* 4. 7. 1910 m. Alma Schmid, Malans	

Cullas fzégras zo da Tesch nu pudevan igls pogrs da Brauégn a Latsch fer faculted, scu ch'igl Champell pretenda pa' gl 16. secul «ena vischnancha benestanta parveja dlas ses minieras etc.» Kècò era en zond meger gaduégn, scu chi's veza or digl protocoll sotwart. Scha anchichî vègva faz blozgers a renovo chesas, schi saro'gl stô parveja dlas podestarejas da Vucgliena a tres emigrazion, scu chi's ò anch'oz cumprouas (vegr Cud. d'Est. a Ger. Prot. scu er chesa No. 45 /J.J.C.1747/).

*Protocoll 1842 (Cud. Prot. I. 1832—81)*

«Signugr Versell scu administradogr zo'gl Balalen fo avigs, cha scha anchichi vess vîgli dad egr sé Tesch par crappa, cha par igl prem zaro'gl sé'gl pè vîgl, reservo scha anchichî féss zond indiscret cu'gl charger, schi ch'el sèja autoriso, parsistend zieva assér stô faz attent, d'igl s-charter. Par zieva, acio cha minch'en vena pajo par kè cha el mena, schi chi gnaro sé'gl deposit, a kè anch'ent igl cuors da kist uton, drizzo ena stadegra, a cha alogra nu possa'l pajer d'aple fzegra cu 4 crezers par centner (50 ko) chi fo  $\frac{2}{3}$  cr. par Rep ( $\frac{8}{3}$  ko). Scha igls vitturins da cò nu vîglian antrer an telas cundizions, schi cha la Societed mnaro cun egnas amnadegras.

Iglis noss vschens, siond bech disposts da mider en'intelligenza faza, zieva quasi duos ons da cuntegsa ad anz cu chi bena mno en crap, parsvas er dl'impussebilitd da pudegr mincha geda charger 56 Reps (485 ko), kè chi less par assér la discreta dschurneda da 27 bazs igl zé (1 fl. 48 cr. = 3.06 fr.), an Brauégn a Latsch unanimamenz cun 49 paregrs decis da ster a la davosa intelligenza senza lucher, a scha kè nu po assér, schi da lascher, cha la Societed digl Balalen mena sèz igl ses materiel».

Co cha la Societed digl Balalen sèz respettegva igl contrat cun Brauégn as vez'igl cler or dad en seguent protocoll digl medem on:

«La Soc. d. Bal. vègva pglio or digls gods da Tesch a Darlux senza parmess, dimena da frod, 28 plantas ad è parzieva gnegda chastieda cun 2 fr. par planta».

1845 è gnî faz ena noua cunvena culla Soc. parveja dlas fzegras: Da sésom fen zo'gl Balalen 25 blozgers, digl deposit anfen igl fuorn 11 cr. a da Prasegras fen cuor 6 blzg. par Centner. Igl materiel dess gnegr mno d'igls 1. nuember fen igls davos marz.

#### *44. En contrat da matrimuni 1728*

#### *Igl prem orgel an baselgia 1744*

En contrat da matrimuni cun tot spezielas condizions a consequenzas digls 18 uzouer 1728 m'è gnî bi par cas an man, a kè an originel. Igl contrat è gnî publicho an extenso ent igl Fögl Ladin No. 36 1948, igl originel ent igl archiv cuminel.

Zachen P. Florinett era stô marido 1708 cun Anna Juvalta da Brauégn, feglia da Peter Juvalta, ad ò uzî 7 umfants, chi èn tots moarts bi dalonch u sot 2 ons. Igl davos è moarta er la donna 1726. Zieva 2 ons igl omet ò darcho lî as marider a vègva bitto igl îgl darcho sén ena zogvna da Brauégn, Anna da Scriv. Giosch Gregori. Cò ch'igl matrimuni è gnî perfect zi igl contrat cler a net:

El vègva «tramaglio la sê noua spogsa avaunt bain lung temp», finelmaing er la dumandeda «per la sia legitima spusa u muglier». Ben vègvan igl Scriv. Giosch a la sê Anna traz ent informazions a chatto, cha Cuéj Zachen, «l'hom ans ho paria in hom da bun radschignis et bun trattamaint, et eir survgnia buna imfurmatiun da d'üna buna christiauna vitta», ma igl tramagliet diregva memma zî, a'gl Scriv. Giosch ò pglio par mans en zé igl omet, ossa dess el as declarer positivamenz, el nu vîglia, cha la sê matta ven'ent an schglitas gliangias. A cha la sê feglia «nun vöglia igr our da Bravuoing, stante ch'ella hegia eir bunas partigdas accò». Sén kècò ò declaro igl Cuéj Zachen, «ch'el voeglia chaser in Bravuoing, scha cumandains, in quaista chiesa, et voeglia fer si tuot sia roba per doatta in Ewigkeit. Sco eir do buna sprauntza da's cumpre aint vsching, ch'el craia da d'havair la favugr». A la feglia, «sco saimper per gratzchia da Dieu steda obediainta», ò surlascho tot li bap, «chia dess fer que chia Dieu m'spierta, ch'ella remetta tuot a mi». A Dî ò «spierito» igl Scriv. Giosch: Igl pêr ven a chaser a Brauégn ent an kista chesa. Igl Zachen do an dota la sê antiera faculted, nempe 4000 Rentschs. Da kels venan mess 2000 Rentschs a fet an maniera da livel par adena, igl meglier chi's po. Igls fets dessan gnegr ampundîs par drizzer en orgel ent la baselgia San Peder a San Florin a par «in for Singer in metz la Baselgia chi retschia ilgs tuns delas vuschs» ad er par oters scopos pios, principelmenz par pajer igls cuosts da sepultegra par pora gliogd, cha la palorma dess pero gnegr abolegda.

Igl sot 2000 Rentschs dessan gnegr surdos ad el a'gl fets poss' ni giudegr, ma bech dischminuégr igl chapitêl. An cas cha Anna «nun havess infaunts hirtevels da seis bist», dessan er kels sarvégr zieva la sê moart pa'gl medem scopo scu igls oters. I è gnî numneda ena cumischion da tregs omens, chi vègva da pglier ent a man kist affer, nempe «la chesa del Niebel et Sabi sigr. Pudistaedt Pol Buol f. m. chia alla preschainta as rechiatta seis filg Ml. Otto P. Buol», zieva sia moart igl ses fegl igl vîgl a. u. a., alogra «la chesa ilg Niebel et Sabi sigr. Pudistaedt Marchiett Pol Clo» an medemma maniera, a la tearza chesa «dess esser la mia chiesa da Giosch Clo Gregori u quel chi ais in chiesa saimper ilg voelg maschiell».

La misted è dimena gnegda faza. Ma or digl «cumprer ent vschen a ster a Brauégn in quaista chesa» nun è'gl alogra gnî anguét, parche en pêr ons zieva an'ni fabricho vé Stocl ena chesa noua chi poarta anch'oz l'inscripzion sur la poarta d'chesa:

1735 Quaista chesa ais fabriccheda cun agid digl Segner.

Cun Dieu ho mio hom cumanzo giodom et infina  
süsom et Jachen Florinet ais seis nom.

Dieu banadescha l'antrer et turner  
e chi in quaista chesa ho da ster.

Ma ena saguenda inscripzion sé sot igl tèz resplenda la pora sort da kista famiglia, la dischzéta a dulogr da kist poar om, chi vègva pearz tot igls 7 umfants ad er la donna dla sè prema lag a nun ò uzî er zieva bech megl dra soart. Digl 1731 è naschegda ena feglietta chi è moarta zieva 5 megs. En on zieva è naschegda ena saguenda matta, kella è riveda ad 11 ons, ma digl 1743 èn moartas infra pochs zegs la mamma alogr'er la matta. Igl poar om era darcho cò sulet a'gl verset sot igl tèz vègva radschon:

La moart volva aint in chesas müredas  
al tet sco in chamonas da povers. 1735 G.F.

Ossa féss igl legat cun drèz a radschon ben stô annullo, ma la cumischion è glistess antreda an acczion. I è gnî faz ena noua scriz-tegra tres igl revarenda Otto à Jualta, chi ò cunfirmo igl contrat digls 18 uzouar 1728 a pi anavant preziso, cha kels 2000 Rentschs, faz sé li baselgia da Brauégn, dessan cruder zieva la moart da Cuéj Zachen Florinett li baselgia, a cha par kels possa la baselgia pglier

digls ses bens da Stocl par kel ampoart a cha igl prietsch sèja «in ramissa da Sigr. Podisted Clo Pol Clo». Pero igls artevals digl Cuéj Zachen dessan adavegr igl drèz «da'ls pudair spandraer, cione con bums daners curents termina dad ün ann». A sé'gl orgel, «voliand u plaschand ad üna Hda. vicinantia da fer in orgel in noassa Vda. Baselgia, des sin dito instrumaint gnir fat cun clers bustabs l'nom da dito C. Jacob Florinett». A finelmenz dess igl Cuéj Zachen adavegr la giudeja da kels oters 2000 R. anfen ch'el végva a sèja an stedi viduel, zieva er cruder a Brauégn. A scha el less gnegr a chaser a Brauégn, schi possa'l er fer «senza otra gravezza da Hinderses, s'inclegia vivand in l'stedi viduel».

La prumavegra 1744 è moart er Cuéj Zachen, a la cumischion è egda vé Stocl ad ò stimo or bens par 2000 R. chi èn crudos li Baselgia. (Cud. da Quints No. 1)

Igl orgialet è gnî drizzo digl 1744 a nu purtegva bi las inizielas digl Cuéj Zachen Florinett (J. F.), dimperse er kellas digl Scrivant Giosch Gregori (J. G.) a parfen kellas digl Landamma regente, chi igl ò faz fer, Ferdinand Wolfgang Juvalta, Landamma 1744 (F. W. J. 1744) scu er ancha Vschinauncha Bravuogn (V. B.) a la vopa digl stamboch.

Igl bun orgialet ò sarvî ad imbelliment digl cult divin bod 200 ons. Bgliers ons igl ò suno igl bun Barba Pol Nicolay cu'gls ses fîgls par mincha chanzon u pre, a postludis cullas zeffras sur las notas pa'gls intervals, la vîglia maniera da suner igl orgel, scu chi's chatta anch'ent an cuédaschs vîgls. Er ev d'è ancha pudî suner diversas gedas kist venerabel instrument, turnond digl Seminari da Cuégra. Digl 1930, cur chi an renovo la baselgia radicalmenz, ò'l stî fer lîa ad en orgel nogv a modern, è gnî vandî or d'vischnancha par en quattrin senza ni misericordia ni pieted. Ch'el sèja oz zo Parix an kelcha museum! Che toch da valogr a da parada féss kè stô ent an en ventur museum cuminel dla nossa vischnancha!

#### 45. Da pogrs a pogras a docters da bieschza

La vocazion da pogr è la pi biala da tottas. Kècò resentan a zin tot kels chi lavogran londarvé cun paschion, cun anclîz ad amogr. Adena an contact culla lebra nategra, cun bun ajer a culla sê bieschzetta, kècò è bî, è ideel, en muénd antier pas sè, antant cha bgliers

oters as stan der zo cun zeffras, cun amzegras a maschinas a chi so che, tot chosas senza veta a senza orma. Igl pogr nu fo an prema lengia kents a plans da profit a divertiment, dimperse stegia pi chuntsch zieva a kellas dumondas pi intimas a profuendas digl ses muénd agricul, el è kelchagedas en miaz filosof. Gardè igl vîgl Huggenberger! Ma fer igl pogr nun è nimia ena choa schi simpla, scu cha bgliers crèjan. Kè nu basta da metter ent permanent en praseppan plen fen ad en sadial d'ava dasperas par angrascher la nuarza. A kè nu basta er bech da pavler magari ben las ses vachas, ma der alogra, schi nu tschessan sé'gl cumond, minchatant ena pajeda u pastrégda, u da moarder ent la coua. A tscheartas lavogrs digl pogr èn parfen fiz difficilas, minch'en nu las amprenda mê. Igl mes bap dschegv'adena: Kel chi nu so pavler, nu so mundscher, ni batter la fotsch ni gizzer, kel nu so fer igl pogr! A'gl mastier da pogr nu po er bech amprandî sé'll'universited, kel as po'gl amprender a fuénz bi zo'n uégl ad or sé'gl fuénz. Ma i vol er cò en bun instructer.

Ma oss'è'gl auenda teoria! Gnen pi concret! Igl nos Maccaki era en da kels Dr. pogrs. El vègva stigio, scha nu'm sbagl, a la Sorbonne, usche cha tot igl ses lavurer era tot oter cu kel dils oters, vègva anchiche aristocratic. El vzegva a savegya adena daple cu oters. Usche pretandegva'l, cha kè nu sèja bun da lascher or la bieschza zieva s-chargio d'alp, ad el pavlegva ent d'igl prem zé davent, er scha la bieschza sèz vess preferî dad egr or igl leber a s'allegrer d'igl bun ajer a muiment diseda sén alp. Kè nu sèja bun da lascher maglier ent en buttatsch plen da kista roba senza ni zéj ni foarza, usche chi's droua zieva bi pi bglier fen. Kè era ben en problem schon ben vîgl a bglier discuto. Schon kella geda avant bgliers ons eran ena sègra d'uzouar igl Meschal Uori a'gl Scrivant Zon cu'gl barba Nuten sé'gl ses banchet chi spizzegvan a gnegr la bieschza d'igl buêl. A discutegvan kella spinugsa dumonda. Igl barba Nuten era da different'ideja cu'gls duos oters, a cur cha las vachas venan no ad or da Davos Baselgia cu'gls ses buttatschuns, schi crèja'l d'adavegr cò la cumproua pa'gls ses arguments a clomma triumfond: «Ossa gardè — vogs dschegs — a'gl lung egr — buttatschs!»

Ma turnen t'igl Maccaki! Gô vègva'l surgnâ kist nom? Kè era igl nom dad en Talian chi gnegva mancha sted cu'gls praders cò tar noggs. Ma el era en poar dschani, bech tschient par tschient abel dla lavogr as trazegva'l vé s-chearsamenz cun poch gaduegn. Ma zieva

vègva igl nos pogr minchapass igl pled an bocha «Ti Maccaki!» Par der la sê critica.

Igl pi grond gaudium er'igl las sègras d'anviern da vegr tiers cugr ch'igl Maccaki bavregva la sê bieschza. Anor gnegv'ni guzent, ma anent nun er'igl pussebal dla rabaglier. Cur chi turnegvan da truêsch era ben cò la donna cu'gl ses baston a duster, ma la pora femna nun era buna da tener sé kista bieschza varlassa. Antant ch'ell'era dad ena vart, mitschegva ena mujia da l'otra vart a bod eran tottas davent, cullas couas a l'aria. Igl Maccaki, turno no da truêsch, degva ben ena solenna blaschmeda, cha la donna bi tramblegva, ma antant la bieschza era davent. A cur chi turnegvan ziev' ena lungi'uriala mitschegv'ni da l'otra vart a zegvan ancha zî rumblizond par vischnanch'antuorn, anfen chi reuschégva a la fen, cun azegd êster, da rabaglier vé ad ent da cuort. Ma igl Maccaki as fastinegva da cuérre zieva a tschiffer scha pussebal anch'an viedi l'ena u l'otra palla coua a der ent an kella ena brava moarza. Par ch'ella sèja daman pi scoarta a zèj'ent pi guzent!

Er sén Preda era da kels cun bieschza obedientia. Sé'gls Naz era en fittaden zo dla Surselva, la tatta, chi discurrégva anch'adena igl ses sursilvan, era cusé cu'gl pitschen abiedi igl uton a custodégr la bieschza. Las sègras kella stearlamenta era bi arzanteda sén kels rasdegvets vé las Piazettas a nu pudegvan as distacher. Tot clamer nu zidegv'anguét. A la fen cloma la tatta: «Giacum va si per quella racrotta!» Ma igl pitschen nun ò santî u ò faz l'urêglia da marchandant. Ella ò clamo anch'ena geda, ma darcho nun ò'l dô ledscha. Ma oss'èlla gnegda pi energica: «Giacum, vas si per quella racrotta, aschiglioc ta fiera tot en in schmac. Kècò ò zido, ma igl poar mat ò uzî nom Schmac ancha zî a gliuntsch.

Pi ben savegva l'Onda Griata ent igls Naz da Tuors egr antuorn culla sê bieschzetta. Kè era er igl uton zieva s-chargio d'alp. La bieschza zegva vé pa'gl zé ent palla val, ent a Pedra a Liadenas, a la sègra, turneda anor, stegv'lla er tacheda scu rescha vé da kels rasdegvs a nu legva gnegr an uégl. Ma l'Onda Griata nu dschegva nimia ad a mé, chi era cò aposte par zider, «Vo vé par kella racrotta!», ella as mattegva sé'gl migret sot l'accla a clamegva dad ota vogsch «Loba, Loba!» Igls bieschzets dulzegvan igl cho a gizzegvan las urêglas, a cu'gl saguend clom as mattegvy'ni a'gl galopp no a zo d'igls pros da Chaclauet a dla Gionda vears la punt a no davant

l'accla. En puégnat d'sel era alogra la recompensa palla sê obediencia, kelchagedas er ena bucheda d'pam.

Ma la pi biala è'gl capito ent a Tuors Davant. Lò vègv'igl Maccaki en chantunegs dla medemma tempra, kè era igl Bìglistess. Ma antant ch'igl prem era coleriker era kist flegmatiker an parsona. La sê occupazion agricula preferegda era igl giaschegr sé'gl balapena. Schi's dumandegva par exempl par antant ch'el durmégva, schi nu féss ben faz dad egr a fer anzemal, i vena cuéss da plouar, cò era la sè raspoasta stereotipa: «Kè è bì glistess!» Ma an dumondas teoreticas-filosoficas dla sè uschezétta vocazion er'ni solitamenz d'igl medem avigs.

Ena sègra da zarcladogr — kè era antuorn igls 1890, ad ev era preschent — stègv, ni igls duos Dr. Pogrs lò davant las acclas pisunos, spizzond a gnegr la bieschza dla pas-chigra. Kè era igl prem zé chi vègvan lascho or. Kella prummavegra stègva l'antiera vischnancha an pissier parveja dla zuppena chi era rottia or sén Preda. Cur cha las vachas an cumanzo a gnegr sur igls pros dlas Egslas or a zo years la punt, an kists duos gardo cun îgliuns. Kellas vachas zegvan schon d'igl diamper lev, nu sus-chegvan bod bech metter zo igls pègs. «Kècò am pera dubiugs», zi igl Maccaki, «cha nogs nu vazan la malateja?» El manizegva ben la bieschza! A'gl Bìglistess secundescha: «Hei, hei, kè pér' er ad a mé. I nu san bod zapper sé'glis pègs. Kècò féss ossa schon ena bial'istoargia, scha nogs vessan dad adavegr la zuppena! Ti saperlot ent!» Er el manizegva la bieschza, parsè! A cur cha la prema vacha regva sé davant l'accla, peggia'l cu'gl ses bratsch giagleard antuorn igl cho a dearva sé la bocha — «Hei, hei, cò è'gl vischejas. Oss'ans la mearda!»

La daman zieva an'ni faz rappoart, ad è gnî clamo bi dalonch igl veterinari ent da Chastî a visiter. A'gl Dr. Cuéss, gnî bi da cuort dl' universited, ò propi contato la zuppena ent a Tuors Davant. Oss'as trattegv'igl da preserver iglmenz la vischnancha da kel giast melprivo. Da kel zé davent stègvan igls acclans as desinfetter exactamenz mincha daman anz cu egr dakior. Sper la punt dador las acclas è gnî mess ena gargia cun en sadial d'ava, a kella nu laschegva passer mianch'ena migr senza battegsem. Cò as stègv'igl egr ent cun pègs a mans. Alogr'as pudegv'igl egr or an vischnancha.

Zieva cerca uéz zogs ò'gl uzî nom tot an ena geda, cha or an vischnancha sèja rottia or la zuppena. Igl sadial d'ava cun chlor nu

vègva dimena zido anguét. Ma pir spizzè! Igl Dr. Cuéss vègv'antant faz suenz visitas da controlla ent a Tuors ad ò finelmenz stî cunvgnegr, cha kè nu sèja angina zuppena, kè sèjan stedas bi las solitas vischejas a'gls pègs levs digls prems zegs da pasculazion, ena cuntschenta a regulera apparizion da mincha prumavegra. La gargia cu'gl ses sadial d'ava ò faz mideda davent dla Punt da Tuors Davant or a Sax dàdens la davosa chesa, a nogs acclans stègvan fer igl buégn da pègs mincha sègra anz cu egr ad accla. A kista geda igl sadial ò zido, Tuors è stô preservo dla melpriveda malateja.

#### 46. *Igl Zonin da Tuors*

Usche igl numnegv'ni ben suenz, bech zescht pa'gl ses egen plaschegr, ma propi senza malizcha, hei parfen par igl clechizer. El passantegva nempe on par on dla prumavegra fen igl utoñ tard ent la sê chera accla digls Naz cu'gl tat... La sê «carriera» d'acclan vègv'el pero cumenzo sen Preda, er sé'gls Naz, anoua ch'igls ses genitogrs vègvan en'accla. Ma lò er'igl mattin da catter megs bod ì pearz. Par igl parchirer antant ch'igls genitogrs zegvan a cuélm sén Falo vègv'ni pglio ena fantschialetta taliana. Ma ena sègra, cur ch'els, da s-chigra nuéz, èn gnîs a chesa, nun an'ni chatto ni pitschen ni talianetta. La tîza s-chigra ad angin fîa sén platta! Igl antier tarziel è gnî alarmo, cun lintearnas an'ni cumanzo a cuérre da tot las varts a tscharcher, an visito mincha chanton, mincha fora a'gl degvan igl davos par pearz. Finelmenz è gnî en zégval or d' igls pros d'Egsla. Lò era la matta chi zegva spassizond ent ad or cu'gl pop sén bratsch, chantond: «Dormi bel bambin!»

Ent a Tuors Zonin nun è ì pearz, er scha las pussebilteds féssan stedas lò pi grondas, cun kella gronda ad intransebla chavoargia sper las acclas, kels misteriugs zoppets digls Cloters bi zurvart, las Plattas, igl Salegd, la Veja digl Tumesch a Valzana. Igl bun tat igl parchiregva memma ben. a'gl pitschnet vègta'l memma guzent. «Vol gnegr cun mè ent a Tuors, daman vans ent culla bieschza», igl ò zet en zé da prumavegra igl tat. Kè saro stô antuorn chalonda mêz, scu chi's zegva kella geda ad accla culla bieschza par pavler or. «Ses, cuent è oss'ena bellezza, igl nos pro dl'accla a tot igls oters pros èn ossa zescht ent la pi biala flugr, a sé'llas Plattas schegvlan las mantunellas a tot pudegr. A d'igl rest ans lessans der cuent biala veta.

A cur cha chesch poss sazer igl lazmilch. Vè igl mes cher cun mè t' ampenza, ev féss schiglio cuènt bi sulet». Ma kè nu vess druo tant ruer a tantas amprumischions par parsvader igl Zonin. Egr cu'gl tat ent a Tuors igl gnegv 'avant scu ena fêsta. Che gust er'igl schon la daman dad egr culla bieschza, chi sagliégva igl prem, dla liberted a dlas s-chellas, scu bluorda vé ad ent palla val. A pir, rivos eént l'accla, che fatschantament! Anfen cha tot era ent igl ses lâa zegv'igl en'uriala. Las cachas savegvan ben egr sèz a panton, ma la stearlamenta nu savegv'as padimer. Ma plansî é'gl tuttena reuschî da metter uorden, a benbod è'gl antro kietezza an uégl, bi las s-chellas as santégv'igl ancha zî no'n tîza.

La prema lavogr pa'gl tat era ossa da metter a stiner muéttas a sadials, parche kè era tot s-charlî d'igl lung pos zieva d'igl on passo. Antant zegv'igl years miazzé, sci ch'igl tat ò constato, gardond sé'gl sugliel. An cuort'uriala vègva'l faz en stupend cafê ad en grondiugs tatsch. Aschi ben igl Zonin nu vègva ancha mè mangio en past, miancha cur cha la mamma fadschegva paclanas. Antant vègv'igl mat observo, cha en pitschen uêlin gnegva sot l'ischadégra digl schler or a passegva tres la tîza par svanegr or sot la poarta d'tîza. Li Zonin paregva kè curiugs, ena funtana ent an schler. Ma igl tat igl ò kinto l'istoargia antant ch'els zantegvan. «Kè è ena chera funtana, schon igl mes tat savegva kècò a kintegva d'igls ses vîgls. Cha en chantunegs vaza zet ena geda li ses bsat, cha el fadschess ben da chaver sot kist'ava, ma kel vaza dulzo igl man: «Pall'amogr da Dî! Bi bech chaver sot! Anfen ch'ella cuérra sur tiara é'lla ena benediczion pall' accla a pa'gls ses abitants, ma en'ava sot tiara sot en edifezi poarta disfurtuna a malateja». Ad el savegva da numner exempals. Hei, hei, laschen pir cuérrer las avas scu ch'igl cher Sener ò urdino!»

Las pi bialas ogras vègv'ni la sègra cur cha las lavogrs eran schinedas ad pudegvan egr sé'lla priveda stègvetta culla sè pena choda, la sè glimiera da segv a l'ogretta da parè. Cò era igl bun tat pir ent igl ses element, ad el kintegva eveniments or dla sê mimiergia, parollas ad istoargettas, a vé d'igl ses Zonin vègva'l en ascultadogr atten-tischem. Igl unic fastedi par kel era da garder kella trigla fora vegda sé'lla sê fatscha: igl poar tat vègva bi en îgl ple. Ad el nun ò pudî s'artener en zé da dumander: «Parche ês bi en îgl?» Cun tscheja dulurugsa ò ossa kinto igl tat d'igl sgrischugs accident chi'gl era scun-tro cun mner crappa da fier zo da Tesch. Antant chi s-chargegvan

ent an Prasegras vègva en mel bogv dô ena curniglieda a furo or igl îgl. Igl poar om vess er pudî rester moart. Ma el as tgnegva dafaz bun, ch'el vaz'uzî furtuna, parche ben suenz capitegvan accidents, kelchagedas mortels. A'gl tat cuntnuegva: «O kè era ena greva a stantugsa lavogr. La daman bo stègvans egr cu'gls noss bogvs a las nossas bennas par turner la sègra tard a vègvans apena en Rentsch dschurneda, ma stègvans charger iglmenz 40 reps (1 rep = 8 ko). Ma en zé da miaz anviern è gnî en digls noss cumpuégn, en om zouan da 33 ons, sot igl manton d'crappa sé'gl deposit da Tesch ad è resto moart. Kè è stô ena trista noua palla sê zogvna donna. Els eran maridos avant duos ons a vegvan en mattin.

Ma zî nu diregvan kellas sègras cur chi eran bi sulets. Ent la chombretta as sfuschignegva igl Zonin sotent las cueartas sé'lla sê bisacha da strom, ma da durmegr nun era par el ancha discuors, memma bglieras nouas ampreschions igl zegvan tres igl cho, antant cha tres la parè tunegva igl tic-tac dl'ogra a sé d'igl uégl minchatant ena s-chella. Tant pi ben durmegva'l zieva ent an kella fora choda digl strom, a la daman zegv'igl grev da's sdasder. Cur ch'el a la davosa davrégv'igls îgls, era igl tat schon da zî davent. Bi ena geda, par cas sdasdo anz zé, ò'l vês a garder igl tat or dla fnêstrina, der ena marmugneda ad egr darcho ent an léz. Las steglas, kè era la sê ogra.

Tscheartas sègras gnegvan igls acclans digls Naz a contuorns t'igl tat a plaz, els savegvan nouas dla stégva choda. Cò batarlegv'ni a tabakegvan fen tarda sègra, antant ch'igl Zonin miaz s'andurman-zegva a nu santegva ple igls discuors digls omens. Ma ena geda ò'l tuttena cumanzo a gizzer l'urêglia, cur ch'igl Meschal Clo ò cumanzo a kinter da kè vîgl misteriugs dlas Mignacclas chi gnegva minchatant zo dlas Platas. Kè stègv'asser en vîgl vschen chi era stô bod tot la sê veta a'gl êster scu mercenari a stégva ossa sé'gl Salegd an ena chamma culla sê matta. La vischnancha nu'gl legva arcugnuéscher ple scu vschen, par manchanza d'amussaments, ad an consequenza er bech pglier possess dla sê faculted. Zieva da kè igl nos Zonin nu sus-chegeva par zî bech ple egr sé dlas Platas. Pero igls oters contuorns ò'l uzî benbod parscruto, el zegva sé palla Veja digl Tumesch u vé'n Valzana a gnegv'a chesa cun duos roms u kelcha sachet d'régat a's randegv' usche nizzegval. En zé d'uton ò'l parfen ris-cho da's struzcher ent palla trigda chavoargia, anoua ch'el vègva vês en pêruzuers. Ma igl

pi guzent eral'l tuttena antuorn igl tat a la sê bieschzetta ad era ben-bod en capabel famegliest.

Uéz zegs zieva ch'els eran gnîs ent culla bieschza è rivo ent ena sègra igl Giosch, igl frer digl Zonin, par pglier or las duos amnade-gras, la Grigscha ad ena tremma, parche daman legv'ni cumanzer ad arer. Els fadschegva cadreja cu'gl Barba Plesch, a kè s'aregva kella geda ancha cun areder a fleja, usche chi's druegva dua pêra d'am-nadegras. Igl tat laschegv'egr anvégdas, s'ampisond sé'lla fadeja pallas poras bes-chas an kels zegs digl arazun, totta zé ent an kella tiara greva. Ad el kintegva darcho or dla sê mimiergia: «Avant pochs ons, la Grigscha era kel on tremma, aregvans igl prem zé igl er grond da Zinols, a kel è da duos marendivas. Parkè ans stî egr la daman bod par schiner an en zé. Zieva var tregs oglas la tremma era schi stangla, ch'ella s'dò messa zo simplamenz a miéz la sualcheda a nu legva ple ster sé. Tots sfoarzs nun an zido anguét. Igl davos nun ans savî che fer oter cu schgiundscher las amnade-gras ad egr a chesa. La pora tremma è sted'anavos sé'gl er a giaschegva cò er ancha igl zie-vamiazzé, cur cha nogs eschan turnos. Bi cun stenta ans pudî la fer ster sé. O, kella prema lavogr da prumavegra è la pi stantugsa, pa'glis umans a pallas bes-chas. Igl craschzan so da's reguler, ma igl bieschz sto fer kè cha *el* vol. Parkè vazas adena chigra a cumpaschion cullas bes-chas, ellas ans dan er dapple nez.»

Ple ch'igl tat kintegva, a pi guzent ch'igl Zonin tarlegva. Fad-schond las ses lavogrettas an tîza, uégl a talvo, cun cligr sé crappa sé'glis pros, cun zanter a las sègras sén stégvetta, era'l adena milli dumondas: «Parche nu creschan igls dschembers er ent igls gods or a chesa? Parche nu séjans rasdegv er ent a Tuors? Es té vês igl uarz ena geda? Parche schegvlan las mantunellas?» Ma ena sègra ò'l lî ch'igl tat kenta d'igls chavallers. Ma cò vègv'el toch ent ena corda sansebla, a'gl bun vîgliet ò bi dalonch faz ena tschéja seriugsa a trista. Ben era'l stô bglieras gedas cu'glis oters omens sén a sur Alvra par roba a vègva faz tres immens strapatschs, principelmenz d'an-viern. «Che robas vègvas da mner?» ò igl pitschen lî savegr. «Mo, bareglis d'ven, sachis furment, chastuégnas, fier, sel a tantas otras robas.» — «Ad anoua mattegv'ni la roba, cur chi rivegvan cò?» — «Da mes temp s-chargegvans sé'gl pierti digl Meschal Uori, avant digl ses bap, igl Meschal Pol. Cò gnegvan alogr kels da Falisogr a pglier.

Kintond alogra da kè sgrischugs eveniment chi ò custo la veta ad a tschench omens igl tramblegva anch'oz igl cor. El era stô banî cun oters pa'gl zé zieva. Ma za ch'el vègva schon ordino la bachareja par kel zé, ò'l baratto cu'gl ses Barba Plesch, a kel è ï par el — è ï — ma nun è mè turno ple! Dla sgrischugs'ora a d'igl fregd ènni moarts sén Alvra, a'gl barba Plesch è gnî sepulâ a Chamues-ch. «Igl Barba Plesch ò lascho la veta par mè», plandschegva igl bun tat, antant cha ena larma culegva or d'igl ses unic îgl.

Oss'è gnî igl dvos uton cu'gl tat ent igls Naz, pa'gl Zonin darcho en banadî temp. La bieschza pasculegva ent palla val, turnond la sègra er'lla arsanteda vé da kels dugtschs rasdegvets, tot kècò, a'gls cuélms cullas ses calogrs d'uton, la pizza da Valmela a Prosonch chi glischégva no ad ent palla val, las mantunellas dlas Plattas, las nuschpenas dla Veja digl Tumesch. Las uzouas dla chavoargia a parfen igl uêlin dla tîza, kè eran tot ampreschions, ch'igl mattet nun ò mè amblido ple a chi dominegvan la sè antier'oarma. Lotiers igl bun tat, chi tscharchegva da cuntanter igl ses cher abiedi an toutes manieras. Apir! Kist uton vègv'igl buéb en nogv ancha pi grond desideri, el vègva da cumanzer ad egr a scola, a par kella vègva'l en fastedi immens. Or da tot las delizschas da Tuors legva'l oss'egr a chesa, zieva cha la scola era steda a manzon. Igl tat ò pruo d'igl parsvader da ster cò ancha kels pochs zegs, anfen chi venan ent en zé a zider or culla bischza. «Parche vol oss'egr a'm lascher cò sulet? Garda che bî cha nogs an cò! A la scola cumenza pir igls 20, a kè è ancha kendesch zegs, ma vé d'evna vans a chesa tots anzemal.» Ma tot nun ò zido, anguét, igl Zonin legv'egr a chesa. «Ev sto ben egr or a'm preparer, sès tat, ev nu less asser en d'igls davos, ad ev m'allegr schi fiz sé'lla scola», era la sè argumentazion. A'gl tat ò stî ceder: «Schi vo an man da Dî daman anor cu'gl Barba Giosch, igl mes cher. Ma kè zé, cur cha la bieschz'è gnegd'a chesa, igl Zonin nun ò sus-chi as musser li tat anch'ena bun'uriala. A cur ch'l nun ò ple pudî ghinchegr or, ò zet igl tat cu'gl ses ton buntadegval: «Vezas cò, igl mes Zonin, oss'eschans tuttena cò er nogs, a té nun ês ancha cumanzo la scola.» Da kell'infidelted anvears igl bun tat igl Zonin è stô anriglo tot la sè veta, tant ple, cha kè è stô igl davos on, ch'igl vîgliest ò faz igl acclan. El è moart miancha duos ons zieva.

Ben è ï igl famegliest ancha bgliers ons ent igls Naz, ma kè era cull'Onda Nana. Er kella era buna, igl mussegva cun bunted da tot-

tas soarts lavogrettas a'gl chantegy 'avant las sègras kellas privendas chanzonettas vîglia, cha el nun ò mî ple amblido. Ma schi bî scu cu'gl tat nun er'igl ple. L'Onda Nana stègv'egr vé pa'gl zé or a chesa a'gl laschegva cuent sulet culla sê angreschanterna. 1961

#### 47. *Cur cha son i a Cuégra a scola.*

Che midedas cha kè ò dô igls davos 70—100 ons cun resgard sé'gl viazer! Veja d'fier ad autos ans poartan an pochas oglas tres tot la Svizzra, an duos oglas as vo'gl da Samedan a Cuégra. Alogra pir igls aviuns nu cagnuéschan anginas distanzas. En viedi vé sur igl grond mer an America as kenta oz bi ple cun oglas, bech ple cun zegs u dafaz cun megs scu d'igl temp da Columbus.

Kè era digl 1854 otramenz, cur ch'igl Barba Plesch scu mat da 15 ons è i a Parix, sulischem sulet, fen Cuégra a pè. Bi anfen Chastî vègv'el pudî egr cu'gl postin, ben ziev'igl char, bi kels tschearts tochets, anoua cha la veja era pi buna a planégva, cha igl chavagl currégva, pudegv'el tschanter sé. «Parche ev nu pudegva cuérer schi svelt scu igl chavagl», scregv'el ent la sè prema chearta li mamma, scu as s-chisond. A kè era er ancha digl 1890 usche, cur cha d'è faz igl mes prem viedi a Cuégra par egr a scola.

«Ossa vè, schi lens egr!» ò zet igl bap ena daman d'uton zieva culazchon. Anch'en cuort adia li mamma a lis fradgliunzs, alogra cun leva bogscha sé a davant. Nogs nun an discurrî bglier sén viedi, bi minchatant vègva igl bap da declarer anchiche, parche par mè era kè tot nogv. Suror igl Buégn nu eri ancha mî passo. Ma ev varo tarlo las ses declaranzas probabel bi cun miaz'urêglia, parche igls mes ampissaments giregvan kella daman ampo sur tot la pizza or. Par mè vègva kella daman apunto cumanzo igl saguend chapetal dla mî veta. Ma er igl bap varo uzî igls ses egens ampissaments chi zegvan probabelmenz an otra direczion.

Arrivos or a Lantsch ans faz ena posa a marendà. Ma ossa ò igl bap declaro: «Da cò davent vês sulet, ev sto turner a chesa, ma té nu poss faller la veja a regvas zo Cuégra. Lò at spèzza la tê sora, chi è or La Rüfe t'igl Sar Obrecht, a cun ella vês or tar kel, igl mes cumpuégn ad amei da zuanterna, parche el ò dô cumond, cha té stettas igls zegs digl examen or tar el. Ad el pisserescha pa'gl rest chi fo dabsens». En discours schi lung digl bap nu vègvi ancha mî santî, ad

el m'ò er faz ampreschion scu chi tocha. Ossa m'ènni tuttena bod gnegdas las larmas, m'ampissond cha sèja sulet. Tot commoss d'èja zet adia — a son î. Ev son rivo bencumal zo'n cited, a lò igls ïgls pudegvan garder auenda. Che bialas chesunas, che grondiugsas vejas! A lò bi davant mè ena tuér cun en'ogra ad ena gronda poarta zescht damiéz ent. «Kè è la Poarta Sugra», vègva zet igl bap, «ma té nu vès tres kista poarta, dimperse peglias a schniester kella veja largia chi vo an arch antuorn la cited. Kè è igl «Graben», la Veja digl Foss — igl foss dad ava chi circundegva pi bod la cited — a cò chattas anzanoua la tê sora chi't spèzza.

Igl trafic da kella geda nun era schi grond scu oz, autos nu's vzegv'igl anch'angins, bi cò a lò gnegv'ena charozza an totta cuorsa u kelcha char da furgon. Ma gliogd sé'llas vejas er'igl auenda, bod da bech gnegr tres. Tot leds eschans rivos or La Rüfe. Nogs vègvan bglier da'ns kinter, a da stanglanterna nu savegvi nouas.

Cant agreeabelmenz surpregs soni stô lò da gnegr arvschî d'igl Sar Obrecht, a kè dafaz cu'gl privo rumantsch da chesa. Ad er la donna a'gls umfants am an pglio sé scu en cunfamilier. Ev d'è vès bi dalonch: Cò è la mè sora ben plazzeda, er sch'ell'am vègva plant bi a catter ïgls dla gronda lavogr, dla daman bod anfen la sègra tard. Zieva cuort'uriala m'ò mno igl Sar Obrecht ent la sê gronda vena sper la chesa ad ò zet: «Ossa poss manger éjas anfen cha té poss!» Ad usche ben nu'm an gusto las éjas mè ple igls zegs dla mè veta scu kella sègra or la Rüfe.

Igl zé zieva vègvi dad egr ent a Cuégra a fer examen palla tearza classa digl Seminari, usche vègva disponî igl mes bun magister Luzi Marugg. La daman bod ò igl Sar Obrecht lascho metter sot igl chavagl a'm ò mno culla sê charozzetta ent a Cuégra. Ent la «Giassa Imperiela» s'ò'l farmo cun zegr, ch'el am surdetta ossa a la chigra digl ses kino, prof. Florin. Igl bun vîgliet era fiz zo-p a zegva cun en baston, parkè nu poss el gnegr cun mè sé Sant Luzi. Igl Sar professer am ò salido culla sê cuntschenta giovialited: «Da ist also der Student. Jetzt kommst du mit mir». A'gl bun professer Florin, t'igl kel ev d'ée uzî la furtuna d'adavegr bglieras ogras tres tot igls ons, am è adena stô scu en bap, ev igl d'è anfen oz tgnî an buna a grata mimiergia.

D'igl examen, chi ò tregs zegs, nu vègvi angina temma. Igl bun accogliment or la Rüfe am paregva en bun sén, ad usche è'gl er

dvanto. Igl examen nu'm paregva miancha grev, ad ev son pglio sé an tearza classa, antant cha tregs d'igls mes cunsulders èn gnîs mess an saguenda classa. Igl zé zieva ò cumanzo la scola, a kel intermezzo dla prem'ogra nun èja mî ple amblido. Saguend orari vègva la nossa classa la daman a las siat istoargia naturela t'igl prof. Truog. Kè zé eri gnî ent dla Rüfe a pè a son rivo bod tschench minutas memma tard sé St. Luzi, nu sus-chevga bod miancha egr ent, parche cuènt santégi schon professer a sculers an plena instruczion. Ma ev nu vègva angina lèzza, ev d'è stî egr ent. «Dononder vens té, pir tschench minutas memma tard?» m'dò arvschî igl Sar professer poch amiegval. Ad ev l'è barbotto cu'gl mes dialect tudegs-ch meladêster: «I bin vo der Rüfe cho und han mi verspötet.» — Ma igl sever Sar professer am ò apostrofo an ena maniera, cha son stô cò scu en pluffer: «Kannst du nicht hochdeutsch reden!»; tot schmess am d'èja bitto ent an en banch, a par en'antier'uriala nu sus-chevvi miancha dulzer igl cho. Milli ampissaments cunfus as cruschegvan ent igl mes tscharvî. Ma or da tot la confusion s'o cristalliseda bi dalonch la clera concepcion: «Bom, bom! Kècò è en schgliat cumanzament! O kè da significher dischzeta?» A propi! Kè on è ï tot sotsogr. Séllas vacanzas da Nadel vègvi spizzo cun tanta vègva brama ad angreschanta, cha nu las pudegva bod bech veqr a gnegr. Ma zescht prizîs uéz zegs anz Nadel, antant ch'igls mes ampissaments eran schon ple a chesa cu t'igls roms da scola, an'ni constato tar mè igl viruos-chal a m'an transperto ent igl ospidel, anoua cha d'è stî ster anfen zieva Buman a ch'igls mes camerads èn turnos dlas vacanzas. Ma bech auenda da kècò! Kendasch zegs anz las vacanzas da sted soni crudo cun fer gimnastica melamenz zo dlas parallelas chi m'an pglio sé miaz moart a tramess dalonch a chesa cun en fearm cunscass da tscharvî, kista geda an vacanzas anticipatedas.

Ma turne'n anch'en mument anavos t'igl prof. Truog. Zieva cuort'uriala soni sdasdo or digls mes siemmis, vzond chi's trattegva da flugrs. Mincha sculer vègva davant sè sé'gl pult ena flugr, a'gl professer declaregva an maniera antarassanta. Ma la botanica era igl mes rom predilet. Schon an scola vègvi uzî igl cumanzament, ma la sted passeda vègvi pudî m'aprofundégr ancha pi ben an kist rom. Igl bun Sar revarenda Clo am vègva declaro sen divearsas gitas veqr ben la morfologia, classificazion a trattament dlas plantas, ad ev vègva schon en bial erbari. «Kel muéssas cuzo li tê magister da bo-

tanica», am vègva zet igl Sar revarenda Clo. Parsè cha d'è alogra dalonch pglio part vé dla discussion, vzond ch'igls pless d'igls mes consculers nu vègvan ancha angin'ideja dla botanica, a'gl Sar professer è stô supregs dlas mes «vastas cugnuschentschas an botanica. A cur cha d'è zieva pochs zegs musso igl mes erbari a giavisch d'igl controller a der er kelcha noms chi manchegvan, cò la sê luna as vègva mideda completamenz. A da cò davent eschans stôs igls meglers ameis. Bi pcho, cha kè ò pudî direr bi cuort temp. Ancha igl medem uton ò el mido piazza ad è ì zo Berna scu magister digl Seminari. Ev nu'gl è melaveta mêm vês ple.

1961 Aviöl

#### *48. Igl on dla som 1816/17*

Curiugs, ch'igl revarenda Otto Giuota, chi era cò a Brauégn 1794—1848 a scregva ent igls cuédaschs da baselgia d'igl 1836—47 divearsas gedas davart l'ora a stagion, nu manzona la misergia digls ons 1816 a 1817, scu cha'l nun ò er bech manzuno kels sgrischugs ons dl'invasion austriaca a fancesa 1799/1800.

La sted 1816 sèja steda ena fiz schgliata, adena plievgia a negv a fregd. Igls pogrs vazan uzî gronda fadeja a stenta da rabaglier ent la racolta, a kella ancha schgliata. Igl uton sèj'igl crudo ena gronda negv a mess sot bod tot las miâs, chi nun eran ancha madigras anandrèz, a'gls ardefals stègv'ni chaver or sot la negv. Ma kella geda era kista situazion pi critica, cu kè ch'ella féss oz. Igls pogrs eran avisos a ké chi vègvan sèz, els nu pudegvan egr zo'gl Consum a cumprier. Kella pocha roba chi rivegva ent las nossas vischnanchas or da pajegs êsters pi frizzegvals, principelmenz sé dl'Itaglia, stègva gnegr transpurteda da chavallers sén stantugs viedis sur igls cuélm, parche vejas charregiablas sur las muntuégnas nun existégvan ancha anginas. Igl Land. O. P. Buol scregva 1809 ent igl «Sammeler»: «Brauégn compra minch'on years 100 somas sejal no d'Itaglia, sé d'igl Vnuost u ent d'igl Schwabegs. Ultra kè as compra er furmantun, farena da furment a regs. Igl consum da pan è cò fiz fearm». (vegr Pro Brav. 3 anneda)

Schi's s'ampenza, cha kè era generelmanz usche, bech bi an Grischun, ma er an Svizzra Bassa, schi as lasch'igl cerca s'figurer la misergia da kels ons, ad er cha kè ò dô charesteja suranzo.

La mêmamma ans ò bglier kinto da kè on, ad ella, naschegda 1836, vègva or da prema funtana. La sê mamma era kella geda craschegda a s'algurdegva ancha ben auenda da kella misigeria. Ella vaza kinto:

«Nogs vègvan ke er vé'n Saldsché sé sot igl god. La miâs era sot la negv a nogs nu vègvan angin pan. Cò ans pglgio igl nos bogv culla benna d'anviern, cun en lanziel ad en pariel ad eschans ìs vé'n Saldsché. Lò algantegvans negv ent igl parîel a bittegvans l'ava choda sé'lla negv, alogra tagliegvans zo zievaman las spéjas, fadschegvans monettas, cha nogs mattegvan ent igl lanziel. Usche eschans gnîs a chesa cun ena banadegda cheargetta d'pan. Ma ancha nun er'igl pan! Igl gran er'ancha bletsch, a'gls mulens eran dschlos ent! Che fer? Nogs an pandâ sé las monettas sén pena, a cur chi era sech ans sfruscho or igl gran cu'gls mans a stègvan ossa moller cun en mulen da café. Kè degva ben ena pora farena, ma nogs stègvan asser cuntents, kè degva iglmenz ampuet pan, er scha kel era cogt scu petta cun vîglianás. Igl pix è alogra ancha stô, cha igl on zieva igls prietschs zegvan adena pi ansé, cha kè nun era ple pussebal da cumprer robas chi féssan stedas negr dabsens».

Mêz 1962

#### 49. *En'aventura digl bsat Zon Zanett*

Igl mes bsat Zon Zanett Cloetta era en omet da media statura, scu chi m'an kinto, ma tenace, andschignegval, prattic a da gronda prontezza da spiert. El effettuegva tr. o. er da tottas sorts lavogrs palla vischnancha. Usche ò'l surpglio digls 1830 p. ex., anzemal cun Cuéj Christophe Battaglia, da reconstruégr «quel Pantun gio l'Argiglia in Streda, sto ruot gio, per R. 90.—» El era naschî 1789 ad è moart 1857, el era abiedi da l'oter Zon Zanett, chi era stô ena seria d'ons an Dalmazia cu'gl ses frer Zachen, vègva faz ena buna faculted, era alogra turno a chesa a lascho renover la sê chesa cull' inscrizion:

Chesa bod zodem vischnancha  
No. 45 oz Clo Giuota

J. J. C. 1747  
Chi chi ria d'me  
nun s'algorda d'se;  
sch'el d'se s'algordess,  
me cun pos laschess.

Kel nu vègva, scu chi pêra, er angina temma da zegr la vardet galegv or, er scha kè igl pudegva fer don. Cur ch'igl Zanot ena sègra digls 1772 cun turner da fègra cun oters ent d'igls pros dad Avalungia vègva giaschlo igl megster Zachen par ena bagatella mela-menz, è'l gnî clamo scu pardéza avant güdisch, ad ampè cu zegr scu bgliers oters: «Ev nun è ni vês ni santî!», ò'l testificho tenor la vardet: «Chia passond sudet Janot in deto loe, schi hegia Mr. Zachen duvro pleds inpropris la seguonda geda, et sin aque igl hegia sudet Zanot trat ina slafeda, chia el saia do per terra.» (Ger. Prot. No. 13, 22 May 1772)

D'igl bsat Zon Zanett an'ni kinto la seguent'aventura:

En zé zieva miaz anviern era'l î cu'gl ses chavagl a duos cuortas or an Urmena par tramas. Kè era en anviern cun bgliera negv, la veja ancha buna, ma divearsas lavenas eran schon zo. Cur ch'el è rivo culla sê cheargia lungia ent igl strèz dla Val d'Urmena, vègva'l ressa da gnegr antuorn la stierta, i trazegva la cuorta davos adena sur vej'or. Ma el vègva en bun chavagl fido. El pudegva ster sper la cuorta davos a clamer zievaman «Hü pass!» A'gl chavagl trazegva en u duos pass a's farmegva, ad antant stumplegv'igl tat la cuorta darcho ent an veja. «Hü pass!» A darcho duos pass. Kè zegva d'igl dianzer plan anavant. Ma antant ch'igl chavagl fadschegva igls ses pass a'gl om murtiregva vé dla cuorta davos, senta'l tot an ena geda a scruschégr la lavena cusé — kella vègva da passer cò zo palla val! Usche nun er'igl da lascher crescher earva sot igls pègs. Duos sagls vé devant, pglier la s-chigr or dla tramma, taglier la tretscha devant a der cu'gl moni ena schlaffa ent pa'gl chalon digl chavagl cun entrément sbrîz, cha kel ò straz cun foarza la cuorta sotor ad è î an galopp vé ad or dla val, igl om zieva — kè è stô igl faz dad en batterdîgl. Ma els eran salvos. Kè era par furtuna ena lavena da chod. D'igl ses sgigr poast ò igl poar bsat pudî vegr a passer zo la lavena ad egr cun cuortas a tramas a tottafaz vé a zo l'Arzetta.

Mêz 1962

#### 50. Cô ch'igls noss pogrs straschinegvan avant 100 ons

La mê tatta Data Nicolay, sora digl mes bsat Zon Zanett Cloetta, (naschegda 1800, moarta 1875) era cò la sted 1854 suletta cullas ses

duos mattans (Data, mamma dla Nanna Härtli, 30 ons, Nana, la mē mamma, 18 ons). Igl bap era dschlo sen Alvra 1844 scu chavaller, igl fegl Stegvan era i gl on zieva da 16 ons an Frantscha, igl saguend, Marchet, poch zieva a Trieste a'gl pi zouan, Plesch, avant pochs megs er an Frantscha. Sé'lla prema chearta digl Plesch raspuenda la mamma culla sê penna d'ocha:

Sett. 1854

### Cher filg, meis salids

Et ais gia da lench cha't scriv chartas in meis inpiissamaints, hoz pero ais rivo que leng desidero mumaint cha at poss fer a savair nossa buna sandet, in simil benifizi sco he inclet our da tia baingnida charta, schi est eir ti partizipevol per grazcha dil Segner, sco eir da tieu bun viedi, non poss ingrazcher il Segner avuonda ch'el at ho mno a tieu destin felicimaing et hest eir chatto il nos Stefan in buna sandet, ludo Dieu.

Ti am dumandasc-h meis cher filg, co cha saja passo cun nus quaista sted, ma con dischplaschair stoja fich conplaundscher, cha pochs dis zieva cha ti est partieu da qui, schi la nossa Data ais deda gio sin ina fotsch et ho taglio in bratsch da tel maniera, cha ho stovieu ster tuotta sted sainza pudair fer poch u as po dir inguotta infin in huossa, quaista eivna ho'la pudieu gider inpo cul rasti, et ho hagieu fich mel e da plandscher et da flier et dottrizer grandamaing, et eau e la Nana havains gieu da lavurer da mez schlupper, e cur nus gnivan a chesa, schi da fer encha tuot et aucha vair a plaundscher e puder. Co post be at t'inpisser meis cher filg quant cha vains gieu da pas-santer. Ma tiers tuot que co vains hagieu la muja u bain la imnadira zoppa eir tuotta sted zieva del fain grass, non vains savieu druver pü et ais encha gnida fich schgliata et havains gięu da pavler our bger fain. Co post denovo at imaginer, cur nus vaivan ina chargia fain schi stuvaivans ir a betlager l'imnadira da mner. Co cur nus eiran il pi ot aint, schi ais aucha gnieu la nova giu d'alp, cha saia rurlo nos vde e saia be per crapper. Ma la damaun zieva suna ida si, schi ais gnieu si il cusdrin Marco con me, schi vif eira'l aucha et ho pu-dieu chaminer giu et huossa ais el gnieu frisch, ma eir cun quel vains gieu da flier e pavler our bger fain.

Ma schi pacienza, infin in aco ho il Segner gido et vain bain a gider eir da quinder davent, scha Dieu voul, schi vif dla spraunza, ch'el non vegnia ans banduner infin a la fin.

Il meis cher Plesch, co post be at inpisser, quantas votas cha he m'inpisseda, scha ti fissas co in nossa assistenzia. Scha vess savieu co cha passess, schi non vess dal sgor brich at lascho ir, ma per te ais sto taunt meglier, vegl havair spraunza, cha ti hajast hagieu ina melgdra sted co nus, scha Dieu voul, meis inpiissamaints sun fich bger giu a Bernay.

Huossa at sto auncha dir cha generelmaing ais sto ina fich buna sted, bger fain grass, co et per las aclas, et per ils cuolms passabel, schabain nus vains fat poch in nossas Liadinas. Et quaist'eivna vains fat cun rasdiv et ais fich bger et bun. Il an passo ais eir sto bger, ma quaist an ais encha da pi, et mias et lîema ais eir fich bella, ma ils ardefals han denovo la malatia. Et huossa quaista eivna cha ven schi s-cheargni d'alp, gövgia, ma nus vains auncha da sier 2 pros da rasdiv et encha inpo dlas spuondas il fain, que giaro mel huossa, ma pazienzia schi ven que tuot fin.

Mêz 1962

N.B. Ortografia ple u menz originela

*51. Ena singulera copulazion 1730  
Saguend Nicolin Sererhard «Einfalte Delineation»*

Nicolin Serardi da Zernez, \* 1689 † 1755, rav. a Malix 1710—16, Seewis 1716—54, scregva 1742 ena descripzion digl Grischun, ma el vo principelmenz zieva legendas a filistochas (v. No. 12 Igl chastî da Brombreis). D'igls noss cunvschens scregva'l igl bial giudicat: Igls abitants èn frischs a svelts auenda, scu chi èn tot igls rumantschs. Igls tudegs-chs dessan pir tener tots duos ïgls daviert, schi trafiche-schan cun els, par chi nu venan a la cuorta, igl ses pled, scu chi zin, ten'ni er pi guzent, scha kè igls cunven, cu schi stan (!). Usche kenta'l cu'gl pi grond plaschegr er la patafcha sotgart, cha'l vaza santî a kinter, probabel d'igl nos revarenda. Parche ent igl Catalogus copulatorum stat'igl screz: «20 nuember 1730 Paulum Mullerum octuagenarium/Annam Brangere, supra dictus sponsus, in — ipso copulationis actu animam efflans, nuptys agni iflocatus, eris exuvis ad latum de Mortis tumbae avaesa bis, Deus este propitius. — La pi biala

è'gl ancha, cha Men Rauch (igl grond poet!) vo a publichescha kista patafcha ent igl ses cuédasch «Homens prominentes 1951», chi vol asser scientific!

Nicolin Sererhard scregva:

«Ossa stoja agiundscher cò anch'ena singulera copulazion, chi è scuntreda a Brauégn avant poch ons. Nempe i era en om vîgl, chi era passabel benestant a nu vègv'angin ch'igl fliègva. Kel s'ò amprumess cun ena femna ad ò faz sé ad ella par testament en tscheart quantum, scha ella igl vîglia flier fidelmenz anfen ch'el végva. Igl om ò pglio zo da foarza, a'gls parents dla spogsa an faz prescha culla copulazion, par ch'igl testament vela. Che è'gl scunstro? Kè era d'anviern a'gl sar spogs debel, parkè an'ni pglio an vista ena stégva. Igl copulatogr, par gnegr ancunter, è er stô paranclîz (schaben cha kè vo cunter las nossas Leges synodalis). Igl spogs ven mno or dla sê chesa sén ena schgliogsa ent la chesa da copulazion. Ena rotscha da buébanaglia cuérra zieva a vègvan igl ses grond gaudium (parche kè era par els anchiche danov, cha en schi vîgl a debel om fetscha nozzas cun ena latta zogvna.) La copulazion cumenza ent an stégva, igls spogs am stî s'anschnuglier. Ena femna fearma tgnegva li debel spogs, stond davos el, igl cho cun tots duos mans, par ch'el nu croda dla vart zo. Antant ch'igl copulatogr era vé d'igl meglier lîzer avant, ò lla s'anachîerta vé d'igl ses man, chi zegva las sîogrs a cha la vésta digl sar spogs gnegva frègda, parkè ò'lla gardo dant vé a gardo pi ben la sê vésta, ò vês bi dalonch, ch'el volv'igls îgls a'gl flo è ï or. Ella s'anschnuescha, a sbrizend ò'lla lascho egr en pled, chi nu tona zescht igl pi ben, as volva years igl copulatogr chi fastinegva da lîzer a zi cu'gl ses dialect: «Mo che diavel fadschegs, nu vzegs, ch'igl om è moart?» Dalonch as ò mideda l'algrezcha da nozzas an en planscher a sbrizegr, scu tar las feglis Jambe u Sila, a'gl cher sar spogs a thalamo ad tumulum, mno dla chesa da nozzas s'lla bera da moart.